

申

鑒

冊全



申

鑒

四部備要

子部

上海中華書局據漢魏叢

書本校刊

桐鄉 陸費達總勘

杭縣 高時顯輯校

杭縣 吳汝霖校

丁輔之監造

申鑒序

申鑒五卷漢荀悅著悅仕獻帝朝辟曹操府與孔融及弟彧同侍講禁中悅每有獻替而意有未盡此申鑒所爲作者蓋有志於經世也然當時政體顧有大於總攬機務使權不下移者乎而曾無一言及之何哉厥後融以論建漸廣或以不阿九錫皆不得其死悅獨優游以壽終其亦善處濁世者矣其論政體無賈誼之經制而近於醇無劉向之憤激而長於諷其雜言等篇頗似揚雄法言雄曲意美新而悅無一言及於操視雄爲優矣或言悅書似徐幹王符考其歸茲若人之儔乎吾未知所先後也而三品之說昌黎公有取焉其書世亦罕傳吾蘇黃勉之好蓄異書又爲之訓釋搜討磔裂出入五經三史春秋內外傳老

莊淮南素難天官地志博洽精密多得悅旨雖然悅
之書其有所感而爲乎勉之之注豈亦有感而爲乎
勉之春秋方富行將抒其學出而効用當炳焉赫焉
流聲實於天朝尙何悅之慕哉正德十四年歲在己
卯冬十月旣望吳郡王鏊撰

申鑒目錄

卷一 政體

卷二 時事

卷三 俗嫌

卷四 雜言上

卷五 雜言下

申鑒卷一

漢潁川荀悅著

南豐吳道傳校

政體第一

夫道之本仁義而已矣五典以經之羣籍以緯之詠之歌之弦之舞之前鑒既明後復申之故古之聖王其於仁義也申重而已篤序無彊謂之申鑒聖漢統

天惟宗時亮其功格宇宙粵有虎臣亂政

虎臣漢興輔弼之臣亂治

也

時亦惟荒圯湮

治荒

茲洪軌儀鑒於三代之典王

允迪厥德

迪蹈也

功業有尚天道在爾惟帝茂止陟降

膚止萬國康止允出茲斯行遠矣立天之道曰陰與陽立地之道曰柔與剛立人之道曰仁與義陰陽以統其精氣剛柔以品其羣形仁義以經其事業是爲道也故凡政之大經法教而已矣教者陽之化也法

者陰之符也仁也者慈此者也義也者宜此者也禮也者履此者也信也者守此者也智也者知此者也是故好惡以章之喜怒以泄之哀樂以恤之若乃二

端不愆二端者教與法也五德不離五德者仁義禮智信也六節不悖六節者好

惡喜怒哀樂也則三才允序五事交備百工惟釐庶績咸熙

天作道皇作極臣作輔民作基惟先詰王之政一曰承天二曰正身三曰任賢四曰恤民五曰明制六曰立業承天惟允正身惟常任賢惟固恤民惟勤明制惟典立業惟敦是謂政體也致治之術先屏四患乃崇五政一曰僞二曰私三曰放四曰奢僞亂俗私壞法放越軌奢敗制四者不除則政末由行矣俗亂則道荒雖天地不得保其性矣法壞則世傾雖人主不得守其度矣軌越則禮亡雖聖人不得全其道矣制

敗則欲肆雖四表不能充其求矣是謂四患興農桑
以養其生審好惡以正其俗宣文教以章其化立武
備以秉其威明賞罰以統其法是謂五政民不畏死
不可懼以罪民不樂生不可觀按漢書作勸字以善雖使高
布五教咎繇作士政不行焉故在上者先豐民財以
定其志帝耕籍田后桑蠶宮國無游民野無荒業財
不虛用力不妄加以周民事是謂養生此政之當崇者一也君子
所以動天地應神明正萬物而成王治者必本乎真
實而已故在上者審則儀道以定好惡善惡要於功
罪毀譽效於準驗聽言責事舉名察實無或詐僞以
蕩衆心故事無不覈物無不切善無不顯惡無不彰
俗無姦怪民無淫風百姓上下睹利害之存乎己也
故肅恭其心慎脩其行內不忒惑外無異望慮其睹

去徼倖無罪過不憂懼請謁無所聽財賂無所用則

民志平矣是謂正俗此政之當崇者二也君子以情用小人以刑

用榮辱者賞罰之精華也故禮教榮辱以加君子化

其情也桎梏鞭朴以加小人治其刑也君子不犯辱

況於刑乎小人不忌刑況於辱乎若夫中人之倫則

刑禮兼焉教化之廢推中人而墜於小人之域教化

之行引中人而納於君子之途是謂章化此政之當崇者二也小

人之情緩則驕驕則恣恣則急急則怨怨則畔危則

謀亂安則思欲非威彊無以懲之故在上者必有武

備以戒不虞以遏寇虐安居則寄之內政有事則用

之軍旅是謂秉威此政之當崇者四也賞罰政之柄也明賞必罰

審信慎令賞以勸善罰以懲惡人主不妄賞非徒愛

其才也賞妄行則善不勸矣不妄罰非徒慎其刑也

罰妄行則惡不懲矣賞不勸謂之止善

賞及淫人則善無所勸而為善

者止

罰不懲謂之縱惡

罰及善人則惡無所懲而為惡者縱矣

在上者能不

止下為善不縱下為惡則治國矣是謂統法

此政之當崇者五也

四患既蠲五政既立行之以誠守之以固簡而不怠疎而不失無為為之使自施之無事事之使自交之不肅而治垂拱揖遜而海內平矣是謂為政之方也惟修六則以立道經一曰中二曰和三曰正四曰公五曰誠六曰通以天道作中以地道作和以仁德作正以事物作公以身極作誠以變數作通

易傳曰通其變又曰變則

通是謂道實

惟恤十難以任賢能一曰不知二曰不進三曰不任四曰不終五曰以小怨棄大德六曰以小過黜大功七曰以小失掩大美八曰以訐奸傷忠正九曰以邪

說亂正度十曰以讒嫉廢賢能是謂十難十難不除則賢臣不用用臣不賢則國非其國也

惟察九風以定國常一曰治二曰衰三曰弱四曰乖五曰亂六曰荒七曰叛八曰危九曰亡君臣親而有禮百僚和而不同讓而不爭勤而不怨無事惟職是司此治國之風也禮俗不一位職不重小臣讒嫉庶人作議此衰國之風也君好讓臣好逸士好遊民好流此弱國之風也君臣爭明朝廷爭功士大夫爭名庶人爭利此乖國之風也上多欲下多端法不定政多門此亂國之風也以侈爲博以伉爲高以濫爲通遵禮謂之劬守法謂之固此荒國之風也以苛爲密以利爲公以割下爲能以附上爲忠此叛國之風也上下相疏內外相蒙小臣爭寵大臣爭權此危國之

風也上不訪下不諫婦言用私政行此亡國之風也
故上必察乎國風也

惟慎庶獄以昭人情天地之大德曰生易繫辭文萬物之

大極曰死洪範六極一曰凶短折死生不可以生刑者不可以復

故先王之刑也官師以成之棘槐以斷之周禮朝士掌建邦外朝之

法左九棘孤卿大夫位焉羣士在其後右九棘公侯伯子男位焉又王制曰成獄辭史以獄成告于大司寇大司寇聽之擊木之下情

訊以寬之朝市以共之矜哀以恤之刑斯斷樂不舉

施刑之日則弛懸慎之至也刑哉刑哉其慎矣夫

惟稽五赦以綏民中一曰原心心可矜也二曰明德德可釋也

三曰勸功功可準也四曰褒化化所關也五曰權計權時之宜非常典也凡

先王之攸赦必是族也非是族焉刑茲無赦族類也天

子有四時朝以聽政晝以訪問夕以修令夜以安身

上有師傅下有讜臣大則講業小則咨詢不拒直辭

不恥下問公私不愆外內不貳是謂有交

問明於治者其統近萬物之本在身天下之本在家
治亂之本在左右內正立而四表定矣

問通於道者其守約有一言而可常行者恕也有一
行而可常履者正也恕者仁之術也正者義之要也
至哉此謂道根萬化存焉爾是謂不思而得不爲而
成執之胸心之間而功覆天下也

自天子達於庶人好惡哀樂其修一也豐約勞佚各
有其制上足以備禮下足以備樂夫是謂大道天下
國家一體也君爲元首臣爲股肱民爲手足下有憂
民則上不盡樂下有飢民則上不備膳下有寒民則
上不具服徒跣而垂旒非禮也故足寒傷心民寒傷
國

問君以至美之道道民民以至美之物養君君降其
惠民升其功此無往不復相報之義也故太平備物
非極欲也物損禮闕非謙約也其數云耳

問人主有公賦無私求有公用無私費有公役無私
使有公賜無私惠有公怒無私怨私求則下煩而無
度是謂傷清私費則官耗而無限是謂傷制私使則
民撓擾而無節是謂傷義私惠則下虛望而無準是
謂傷正

正謂賜
予之正

私怨則下疑懼而不安是謂傷德

問善治民者治其性也或曰冶金而流去火則剛激
水而升舍之則降惡

平聲

乎治曰不去其火則常流激

而不止則常升故大冶之爐可使無剛則踊水之機
可使無降善立教者若茲則終身治矣故凡器可使
與顏冉同趨投百金於前白刃加其身雖巨跽弗敢

掇也善立法者若茲則終身不掇矣故跖可使與伯夷同功

問民由水也濟大川者太上乘舟其次汭

汭浮行水上也

者勞而危乘舟者逸而安虛入水則必溺矣以知能

治民者汭也以道德治民者舟也縱民之情謂之亂

絕民之情謂之荒曰然則如之何曰爲之限使弗越

也爲之地亦勿越故水可使不濫不可使無流善禁

者先禁其身而後人不善禁者先禁人而後身善禁

之至於不禁令亦如之若乃肆情於身而繩欲於衆

行詐於官而矜實於民求己之所有餘奪下之所不

足捨己之所易責人之所難恕之本也謂理之源斯

絕矣自上御下猶夫釣者焉隱於手

按手下當有而字

應於鉤

則可以得魚自近御遠猶夫御馬焉和於手而調於